

**Dr Mah Hang Soon Dari MCA Dilantik Exco Kerajaan Negeri Perak  
Bernama  
May 12, 2014**

KUALA KANGSAR, 12 Mei (Bernama) -- Anggota Dewan Undangan Negeri (Adun) Chenderiang Datuk Dr Mah Hang Soon Isnin dilantik sebagai Anggota Majlis Mesyuarat Kerajaan (Exco) Negeri Perak yang baharu.

Dr Mah, 49, yang merupakan Pengerusi MCA Perak, mengangkat sumpah jawatan itu di hadapan Pemangku Raja Perak Raja Dr Nazrin Shah dengan disaksikan Hakim Utama Mahkamah Tinggi Ipoh Datuk Zainal Adzam Abdul Ghani di Istana Iskandariah di sini.

Turut hadir Menteri Besar Datuk Seri Dr Zambry Abdul Kadir.

Selain itu, sembilan anggota Exco lain yang dikekalkan turut mengangkat sumpah dengan diketuai Datuk Saarani Mohamad (Kota Tampan) serta disusuli Datuk Mohd Zahir Abdul Khalid (Kamunting), Datuk Zainol Fadzi Paharuddin (Sungai Manik) dan Datuk Rusnah Kassim (Behrang).

Datuk Samsudin Abu Hassan (Ayer Kuning), Datuk Mohd Nizar Zakaria (Belanja), Datuk Nolee Ashilin Mohd Radzi (Tualang Sekah), Datuk Dr Muhammad Amin Zakaria (Batu Kurau) dan Datuk Shahrul Zaman Yahya (Rungkap) turut mengangkat sumpah jawatan.

Dr Mah pernah dilantik sebagai Exco pada 10 Feb 2009 iaitu ketika Barisan Nasional (BN) mengambil alih pentadbiran kerajaan negeri daripada pimpinan Pakatan DAP-PKR-PAS.

Walaupun memenangi kerusi DUN Chenderiang pada pilihan raya umum ke-13 (PRU13) tahun lepas, kerajaan negeri Perak pimpinan Zambry menghormati keputusan MCA sebelum ini yang menolak sebarang jawatan dalam kerajaan ekoran pencapaian 'layu' parti itu pada pilihan raya umum itu.

Pada Februari lepas, MCA mengumumkan kesediaannya untuk menerima jawatan kerajaan di semua peringkat.

Sejurus selepas PRU13, Zambry hanya melantik sembilan orang Exco berbanding amalan biasa 10 orang, dengan memperuntuk satu kekosongan itu untuk wakil

BN daripada MCA sekaligus.

Ketika ditemui pemberita, Dr Mah yang juga pakar kardiaologi berkata pelantikan sebagai Exco kerajaan negeri selepas setahun menjadi Adun merupakan peluang buatnya untuk memberi lebih banyak perkhidmatan kepada rakyat dengan sebaik-baiknya.

Mengenai portfolionya, Dr Mah berkata perkara itu akan diumumkan oleh Zambry dan beliau akan memberikan khidmat terbaiknya.

Pada PRU13, beliau meraih 10,866 undi menewaskan calon PKR Amani Williams-Hunt Abdullah yang mendapat 6,099 undi dengan majoriti 4,767 undi.

Kerusi DUN Chenderiang merupakan satu-satunya kerusi yang dimenangi komponen BN di Perak selain Umno.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1037759>